



# SIXIÈME SERMON.

Matth. V. v. 14.

*Vous estes la lumiere du monde.*



Qmbien qu'il n'y ait rien au monde si clair que la lumiere, si est-ce que sa nature est obscure, & malaisée à comprendre. Les plus grands Philosophes s'y treuvent bien empeschez. La lumiere est vne œuvre de Dieu excellente, par laquelle il a commencé de desployer sa vertu: par là il a commencé la creation du monde, ayant dit au premier iour, *Que la lumiere soit:* La lumiere est la premiere des beautez, sans laquelle toutes les autres beautez ne seroyent point recognoissables. Apres l'homme, lequel seul entre les creatures visibles a esté créé à l'image de Dieu, la lumiere est la creature qui imite d'avantage la nature de Dieu, & qui a plus de traces de sa vertu: Car comme dit saint Iean en sa premiere Epistre, *Dieu est lumiere, & n'y a point de tenebres en lui:* Et S. Iaqués l'appelle, *Le Pere des lumieres:* Dont il a voulu donner vne preuve en éclairant le monde par trois iours sans Soleil (car le Soleil n'a esté créé que le quatrieme iour) pour monstrier que  
pour

pour éclairer le monde il n'a pas besoin de Soleil, veu que lai mesme est la source de lumiere.

Que si vous considerez comment le monde est fait, vous recognoistrez que les parties du monde sont plus ou moins claires, selon que plus ou moins elles approchent du lieu où Dieu a posé son throsne, qui est par dessus les Cieux: Car les Cieux sont plus clairs que l'air, & que la region elementaire, & l'air est plus clair que l'eau, & l'eau est plus claire que la terre, laquelle est la partie la plus obscure du monde, pour ce qu'elle est la plus estoignée du lieu où Dieu a mis son habitation. Ce que ie dist touchant la lumiere, qui eclaire les yeux du corps, doit aussi estre entendu de la lumiere qui eclaire les ames: car les Anges qui contemplant la face du Pere celeste sont appelez Anges de lumiere, pour ce que Dieu les eclaire de plus pres. Apres les Anges sont les hommes que Dieu eclaire par sa parole, & sanctifie par son esprit, lesquels aussi sont appelez en l'Ecriture, *lumiere & enfans de lumiere*: Mais les reprovez que Dieu a estoignez de sa grace, sont appelez en l'Ecriture tenebres, & leur portion est es tenebres eternelles.

En un point principalement la lumiere imite la nature de Dieu, assauoir en ce que la lumiere est la seule chose laquelle nous voyons en mesme facon que les Saints voyent la face de Dieu en son Royaume celeste: car pour voir les autres choses, comme maisons, arbres, hommes, il n'est pas besoin que ces choses entrent dedans nos yeux: Il n'y a que la lumiere laquelle nous ne pouons voir si elle n'estre dans nos yeux, & ne remplit nos prunelles: Et c'est ainsi que les Saints voyent la face

de Dieu, lequel les remplit de lumiere & de perfection par l'irradiation de sa face.

Ceste lumiere qui est en Dieu est vne lumiere qui ne fait point d'ombre ; car toutes choses lui sont transparentes, comme dit l'Apôstre aux Hébreux au 4. chapitre, *toutes choses sont nées & découvertes aux yeux de celui auquel nous auons à faire* : C'est vn Soleil qui ne se couche point : qui non seulement eclaire les yeux des voyans, mais aussi donne des yeux aux auengles. Si le Soleil donne sur la face d'vn homme laid de visage, il ne change pas sa diformité ; mais la lumiere de Dieu, & la clarté de sa face change les ames qu'elle eclaire, & corrige leurs defauts, & les transforme à sa ressemblance.

Or tout ainsi que Dieu creant le Soleil a ressemblé & attaché au corps du Soleil toute la lumiere qui estoit esparse par le monde, & a voulu que le Soleil fust l'œil du monde, & qu'il n'y ait au monde aucun iour que par lui ; aussi Dieu qui est le Soleil des ames, & le pere des lumieres, a mis en son Fils vnique toute plenitude de lumiere spirituelle, afin que nul ne iouist de ceste lumiere spirituelle qui eclaire les ames, & nous decouvre la face de Dieu fauorable, que par Iesus Christ qui est la resplendeur de la gloire du Pere, & son fils bien-aimé : Pour ceste cause Zacharie pere de Iehan Baptiste au 1. chapitre de S. Luc dit que quand Dieu a enuoyé son Fils au monde, *l'Orient d'orient nous a visitez*, car c'est vn Soleil qui ne se point leué à fleur de terre, comme le Soleil qui eclaire les yeux du corps, mais qui est venu à nous du plus haut des Cieux ; Et Etie au 9. chapitre dit

dit qu'à la venue le peuple qui cheminoit en tenebres  
 a veu grande lumiere, & que la lumiere a resplendi  
 sur ceux qui habitoient au pays d'obscurité mortelle:  
 Luy-mesme au 8. de saint Iehan nous dit, Je  
 suis la lumiere du monde, celuy qui me suit ne che-  
 minera point en tenebres, ains il aura la lumiere  
 de vie.

Mais comme quand avec vn grand flambeau on  
 allume plusieurs chandelles, ainsi Iesus Christ se  
 retirant de ce monde a departi & communiqué  
 de sa clarté à ses Apostres, & illuminé leurs esprits  
 de la lumiere celeste par l'Euangile, afin qu'ils e-  
 clairassent les autres, & portassent ceste lumiere  
 par tout le monde. Ce que Dieu a donné à enten-  
 dre lors que l'esprit de Dieu descendit sur eux en  
 forme de langues ardentes, Dieu declarant par là  
 qu'il se seruoit des langues des Apostres pour  
 éclairer les nations, & escarter les tenebres d'i-  
 gnorance.

C'est pourquoy nostre Seigneur Iesus les ayant  
 appelez au verset precedent *le sel de la terre*, pour-  
 ce que la parole dont ils estoient porteurs empes-  
 che les hommes de se corrompre, maintenant il  
 les appelle *la lumiere du monde*, disant, *Vous estes la*  
*lumiere du monde, la ville assise sur une montagne ne*  
*peut estre cachée.*

Or les Apostres estans la plus part pauvre pes-  
 cheurs, idiots, sans science, sans moyens, sans elo-  
 quence, sans autorité, & ayans peu d'instruction  
 en la doctrine de l'Euangile, lors que Iesus Christ  
 leur tenoit ce propos, ie ne doute point qu'ils  
 ne fussent estonnez ou honteux, & qu'ils ne s'en-  
 tre regardassent l'un l'autre, disans en eux mesmes,

*Qui sommes-nous pour éclairer le monde, nous pauvres gens, incognus & contempibles? sommes-nous personnes propres à éclairer toute la terre? Mais après la Resurrection du Seigneur, Dieu les ayant remplis de cognoissance & de zele, & de magnanimité, & ayans veu le succes de leur predication, ils ont appris que Dieu se sert des choses petites pour faire des grandes œuvres, & qu'il n'y a point de fables outils en sa main.*

Cependant cette façon de parler *vous estes la lumiere du monde*, ne doit pas estre prise, comme si les personnes des Apostres, à proprement parler, estoient la lumiere du monde: ce titre ne convient pas à leurs personnes, mais à la parole de l'Euangile, laquelle ils deuoient porter par le monde: Ils ont esté la lumiere, en mesme façon que nous appellons vne lampe vne lumiere: De Iehan Baptiste Iesus Christ au 5. chapitre de saint Iehan dit *Qu'il a esté vne chandelle ardente, & que les Juifs pour peu de temps se sont egayez en sa lumiere*: Mais afin que quelqu'un ne prist Iehan Baptiste pour la lumiere mesme, S. Iean l'Euangeliste au 1. chapitre nous dit, *Qu'il n'estoit pas la lumiere, mais qu'il estoit venu pour rendre tesmoignage de la lumiere*. C'est à quoi tout fidele Pasteur doit prendre garde soigneusement de n'attribuer iamais à son sçavoir ou à son bien dire le succes de sa predication: que iamais il ne s'attribuë à soi-mesme la louange d'illuminer les esprits: qu'il sçache qu'il n'est pas la chandelle, mais le chandelier. Ainsi S. Paul en la 1. aux Corinthiens chap. 15. après auoir dit, *s'ay trauaillé plus qu'eux tous*, adiouste comme par forme de correction, *toutefois non pas moi, mais la grace de Dieu qui est avec moi*.  
Puis

Puis donc que ce titre d'estre la lumiere du monde conuient premierement à Iesus Christ, & à cause de lui à la parole de l'Euangile, c'est à nous de voir pourquoy ceste parole est appelee la lumiere du monde.

1. Sçachez donc que comme nos corps ont des yeux, aussi nos ames ont vn œil qu'on appelle l'entendement : car c'est par l'entendement que nous cognoissons & discernons les choses. Or ce qu'est la lumiere du Soleil à nos yeux, cela mesme est à l'œil de l'entendement la cognoissance de la verité. Non pas la cognoissance de toutes sortes de veritez, (car il y a des vrayes cognoissances de choses inutiles & de peu d'importance) mais la vraye cognoissance des choses grandes & excellentes : Item la cognoissance des choses profitables, & qui rendent l'homme plus sage & plus honteux. Or il n'y a rien si excellent que Dieu, ni rien tant profitable que de cognoistre la voye de salut, & les moyens par lesquels nous pouuons estre agreables à Dieu. Ces deux choses nous sont enseigneés par l'Euangile, auquel se descouurent à plein les thresors de la sapièce de Dieu, & ces mysteres esquels les Anges desirerent penetrer iusqu'au <sup>I. Pis r. 1.</sup> <sup>12.</sup> fonds, ceste sapièce que les Princes de ce monde n'ont point cogneue. Auquel aussi nous est mon- <sup>I. Cor. 2. 8</sup> stré le chemin de salut, & le moyen par lequel nous pouuons estre reconciliez à Dieu, lequel a mis en lumiere la vie & l'immortalité par l'Euangile, comme dit saint Paul 2. Timothee chapitre 1.

C'est là la prerogatiue de l'Eglise par dessus le reste des hommes, d'estre eclairee de ceste lu-

miere: Dont aussi au 12. de l'Apocalypse elle est representee comme estant environnee du Soleil, & ayant la Lune dessous ses pieds, pource que la parole de Dieu l'eclaire de tous costez, & qu'elle foule aux pieds l'instabilité des choses inferieures.

Celui qui vit sans cognoissance de Dieu, & sans cognoistre la voye de salut ressemble à vn aveugle qui taste le chemin en l'obscurité, ou à vn voyageur qui se fourvoyant de nuit se va ietter en vn precipice. Mais quand il plaist à Dieu faire lever sur lui la clarté de sa face, & lui manifester Iesus Christ par l'Euangile, incontinent les escailles de l'ignorance lui tombent, & ayant apperceu le precipice où il couroit, rebrouillé chemin avec vne ioye meslee d'horreur & d'estonnement, disant en soi-mesme, *l'ay esté à deux doigts de me precipiter en un gouffre de perdition eternelle: Mais Dieu par sa bonté infinie a eu pitié de moi.* La cognoissance de ceste verité surpasse autant en excellence la cognoissance des autres veritez, que la clarté du Soleil surmonte la lueur des chandelles.

Et ne faut douter que quand Iesus Christ disoit à ses disciples, *Vous estes la lumiere du monde,* il ne se representast les tenebres obscures d'ignorance & d'idolatrie qui couuroyent alors la face de la terre, & l'horreur des tenebres dont les peuples d'alors estoient enveloppez, lesquelles il estoit proposé de dissiper par la clarté de l'Euangile. Vous sçavez qu'alors l'Eglise Iudaïque, laquelle seule estoit le peuple de Dieu, estoit infectée des sectes des Pharisiens & des Saddociens, tellement que la lumiere qui y reluisoit estoit troublee & meslee

meffée d'obscurité. Les cōducteurs le fournoyoyent, & deffournoyent le peuple du droit chemin.

Mais au reste du monde le diable reignoit absolument par vices enormes, & par vne mortuëuse idolatrie. Les Egyptiens qui ont tousiours esté vn peuple ingenieux & inuentif, adoroyent les bestes. En Grece d'cù sont venues les arts & les sciences dès le temps d'Heliodé, ( qui est la plus ancienne memoire ) les Grecs seruoient trente mille Dieux, desquels le nombre s'est depuis fort augmenté. Ces miserables peuples auoyent mis au Ciel entre les Dieux des combats, des blessures, des festins, & des adulteres. Les diables alors respondoient des caernes, & donnoyent des oracles ambigus touchant les choses futures. Les Romains, peuple civil & belliqueux, ayans conquis vn pays enmenoyent en triomphe les Dieux du pais prisonniers, auxquels puis apres ils desfroyent des Temples & des seruites, & auoyent entre leurs Dieux vne putain publique, vne Deesse tutrice des larrons, & auoyent dressé des Autels à la fièvre & à la malencontre: Estans plongez en ces ordures infames dont parle S. Paul au 1. chap. de l'Epistre aux Romains.

Mais Dieu par sa misericorde infinie, au temps preordonné en son conseil a enuoyé au monde son Fils, lequel est appelé par Simeon, *la lumiere des Gensils, & la gloire d'Israel*: Icelui a enuoyé par le monde, les Apostres pour faire luire la verité celeste parmi des tenebres si épaisses, tellement qu'il est aduenu comme en la creation du monde: car les tenebres couuroyent la face de cet abyssme, quand Dieu tirant la lumiere des tenebres a dit

*que la lumiere soit. C'est à quoi a regardé l'Apostre S. Paul en la 2. aux Corinthiens au 4. chapir. où il dit, Que Dieu qui a dit que la lumiere resplendist des tenebres est celui qui a relui en nos cœurs pour donner illumination de la cognoissance de Dieu en la face de Iesus Christ.*

Chose semblable est aduenüe en ces derniers temps. Car plusieurs siecles se sont passez en Occident, durant lesquels les tenebres couuroyent cet abyfme, & la lumiere de l'Euangile estoit cachée sous le boisseau : On ne parloit alors que de reliques, & de nouveaux miracles, & d'hosties qui auoyent sué, ou cligné la teste, & de nouveaux Saints qui auoyent pris la place des vieux, & d'ames reuenües du Purgatoire demandantes des Messes & des seruices pour leur soulagement : L'Escriture sainte estoit vn liure clos, fermé de plus de sept seaux, & Iesus Christ à peine estoit recogneu entre les Saints : & tout ainsi que quand parmi vne nuit fort noire, on oit gromeler & esclatter les tonnerres, le peuple est effrayé, ainsi parmi cette ignorance si obscure, le Pape tonnoit & lançoit ses foudres, & espouuantoit les peuples & les Rois.

Nostre grand Dieu touché de compassion a leué ce boisseau, & exposé en veüe la lumiere de sa parole. Lors ont paru les abus & l'idolatrie à la veüe des nations : entre lesquelles plusieurs ont fuiui ceste lumiere, Dieu leur ayant ouuert les yeux pour recognoistre la verité. Est aduenü quelque chose de semblable à ce qui est dit au Pseaume 104. A sçauoir que durant la nuit les lions sortent de leurs creux pour se jeter en queste : Mais  
quand

quand le Soleil est leué ils retournent en leurs cavernes, & se tiennent cachez. Alors l'homme sort & s'en va se ranger à son travail. Car durant l'obscurité de l'ignoiâce Satan qui est vn lion rugissant reigne, & rauage, & fait vn grand degast : Mais quand la verité de l'Euangile paroist, le men songe se cache & est confus, & lors l'homme qui craint Dieu se range à son travail, & vaque à l'œuure que Dieu lui a commise.

11. Ceci aussi est le propre de la lumiere de nous faire discerner les couleurs, & les choses belles d'avec les laides, & les bonnes pierres d'avec les fausses. C'est ce que fait la lumiere de la parole de Dieu. Par elles nous discernons les vraies richesses & permanentes, & qui rendent les hommes meilleurs, d'avec les richesses trompeuses, & qui se fondent entre les mains, & qui en corrompent plusieurs, & ne rassasient jamais. Par elle nous discernons les vrais plaisirs, qui consistent en la paix de conscience, & au sentiment de l'amour de Dieu, & en la ferme attente du salut, & en l'exercice des bonnes œuures d'avec les fausses voluptés, lesquelles les bestes surmontent les hommes, qui corrompent les corps, & abrutissent les esprits, & ne sont qu'un chatouillement importun, qui se tourne finalement en douleur & angoisse. Ceste mesme parole nous enseigne à discerner le vray honneur qui consiste en l'alliance avec Dieu par Iesus Christ, d'avec l'honneur mondain, qui n'est qu'une fumee qui s'evanouit en montant, & ne gist qu'en l'opinion des hommes.

Car en ce siecle obscur toutes choses sont deguisees, les vices passent pour vertus, & la super-

stitution est appelee Religion: La pieté est vne es-  
 pece de crime, & la simplicité & integrité est prise  
 pour niaiserie & faute de prudence. Pendant que  
 la verité parle fort bas, le mēsonge tonne en chai-  
 re, & se reuest de titres apparens, de chaires & de  
 succession, & esblouit les yeux par la splendeur des  
 ceremonies, & des temples, faisant comme du  
 temps de Nebucadnezar, sonner ceste musique de-  
 uant l'idole. O combien il y a de Saints caponi-  
 sez par les hommes, deuant les images desquels on  
 brule des cierges, desquels les ames sont tourmen-  
 tees en la gehenne! Combien au contraire de per-  
 sonnes dont la memoire est execrable entre les  
 hommes, lesquels sont les bien-aimez de Dieu, &  
 dont les ames iouissent d'vn doux repos. Il est im-  
 possible de recognoistre la verité de ces choses, &  
 de n'estre point emporté par le courant des faul-  
 ses opinions publiques, si vous n'avez en main la  
 lumiere de la parole de Dieu, qui vous apprendra  
 à iuger des choses, non selon les opinions des  
 hommes, mais selon la volonté de Dieu.

III. Item la parole de Dieu est appelee vne lu-  
 miere, pource que comme ceux qui se fouruoient  
 de nuit retognoissent quand le Soleil s'est leué  
 de combien ils se sont esgarez: Ainsi celui qui du-  
 rant son ignorance auoit pour guide la custume  
 & la tradition des hommes, qui est le chemin de  
 perdition, quand il plaist à Dieu l'illuminer par sa  
 parole, recognoist son esgarement, & de combien  
 il s'est fouruoyé, alors il s'applique la parole de  
 David au Pseume. 119. *La parole est vne lampe  
 à mon pied, & vne lumiere à mon sentier*: Et cel-  
 les de Zacharie au premier chapitre de saint Luc,

Et a reluy à ceux qui croupissent en tenebres, & en ombre de mort, pour adresser nos pieds au chemin de paix. S. Pierre estoit en prison, dormant, & lié de chaines, lors qu'une lumiere lui frappa le costé, & le reuilla, alors lui tomberent les chaines, & la prison s'ouurit, de laquelle il sortit sans empeschement. Chose semblable aduient à celui que Dieu a retiré de la captiuité de l'idolatrie, l'illuminant de sa cognouissance. Car cette lumiere le reueille de son assoupissement, lui frappe le cœur, lui fait tomber les liens de superstition & de traditions humaines, afin qu'estant tiré de ceste captiuité de conscience il chemine en la liberté des enfans de Dieu, selon que Iesus Christ dit au 8. chapitre de S. Iehan, *Vous agnoistrez la verité, & la verité vous affranchira.*

IV. Adioustez que comme lumiere du Soleil eclaire également les pauures & les riches, les petits & les grands, & les Princes n'en iouissent pas plus que les sujets, ainsi la parole de Dieu est proposée également aux pauures & aux riches, & les moindres du peuple y ont autant de part que les plus grands de ce monde. Car c'est la parole de celui auquel tous hommes sont également suiets, & qui n'a point d'egard à l'apparence des personnes. Vairo ie dis, que comme les rayons du Soleil donnent avec plus de force es lieux bas qu'au sommet des montagnes, ainsi arriue-il souvent que la parole de Dieu a plus d'efficace enuers les pauures, & de basse condition, qu'enuers ceux qui sont eleuez en grandeur & en richesses.

V. Ceci aussi est le propre de la lumiere de reioiuyr le cœur, comme dit Salomon au 5. des Pro-

uerbes, que *la clarté des yeux refouit le cœur.* Et Iesus Christ au 5. de saint Iehan dit que Iehan Baptiste auoit esté vne chandelle, en la lumiere de laquelle les Iuifs s'estoyent eslouiz. C'est vn grand sujet de joye à vn auengle de recouurer la veüe : Or par la parole de Dieu, Dieu remedie à nostre auenglement, & semble que c'est la cause pourquoy Iesus Christ illumina vn auengle en lui frottant les yeux de sa saluæ, pour monstrier que ce qui sort de la bouche du Seigneur, est ce qui illumine les ames. C'est vn grand sujet de ioye en vn chemin dangereux & malaisé à tenir, de trouuer vn bon guide, & vne conduite assuree : Or la parole de Dieu est la vraye guide des ames. Ayant à passer par des chemins où Satan est en embasches, & où les hommes taschent à nous seduire, nous eschapperons ces dangers, & tiendrons vn droit chemin quand Dieu nous tiendra la main, & nous adressera par sa parole. C'est vn grand sujet de ioye à vns creature chargés de pechez, & qui tremble sous la frayeur des iugemens de Dieu, de receuoir des nouvelles de paix, & de reconciliation avec Dieu, & d'auoir libre accez au throsne de la grace de Dieu, pour lui presenter nos prieres avec hardiessé & familiarité, & c'est ce que nous auons en croyans à l'Euangile. Es veu que la mort de sa nature est terrible, & dont la pensèe est vn trouble-feste, & qui effraye les profanes, quand ils pensent qu'il leur faut laisser leurs richesses, & leurs plaisirs, & qu'il faut que ce corps tombe & soit mangé des vers, & que l'ame comparoisse deuant le siege iudicial de Dieu, pour rendre conte de toutes ses actions : il s'ensuit que c'est vn grand  
sujet

fujet de joye d'estre deliuré de la crainte de la mort, & n'y penser qu'avec ioye, comme au iour de nostre deliurance, & de nostre approchement de Dieu. C'est ce que nous auons par l'Euangile, par lequel est annoncée la deliurance à ceux qui par crainte de mort estoient toute leur vie assuiettis à seruitude, comme dit l'Apostre aux Hebreux chapitre 2.

Tous ces suiets de joye nous sont donnez par la parole de l'Euangile, par consequent c'est à bon droit que Iesus Christ au 15. de saint Iehan disoit à ses disciples, *Je vous ay dit ces choses, afin que ma ioye demeure en vous, & que vostre ioye soit accomplie.*

Ces choses estant telles que peut-on dire de ceux qui au lieu de s'esioüyr de ceste lumiere, s'irritent à l'encontre, & voudroyent qu'elle fust esteinte ou cachée pour iamais, sinon que ce sont enfans de tenebres, semblables aux hibous qui fuyent la clarté? Tels sont ceux qui defendent la lecture de l'Escriture sainte, & empeschent qu'elle ne soit traduite en langue que le peuple puisse entendre. Ayans soustrait au peuple ceste lumiere, au lieu d'icelle ils allument des chandelles en plein midi: au lieu que les escrits & Epistres des Apostres doivent estre autant de lumieres pour eclairez les ames, ils eclairent les images des Apostres de chandelles en plein iour, lesquelles toutesfois n'en voyent pas plus clair. Ils ont des images muettes au lieu des liures parlans. Ils enseignent que s'arrester à l'Escriture est la source de toute impieté & irreligion: que c'est vne espée à toutes mains, & vn nez de cire, vne pierre de scan-

dale, vne reigle muette & imparfaite. Par ce moyen ils s'estudient à ignorer, & bandent les yeux au pauvre peuple, afin que sans resistance il se laisse conduire à ceux qui à la faueur d'une nuit obscure ont auancé leurs affaires, & basti vn empire terrien.

De là procede la haine horrible qu'ils portent à ceux qui portent ceste lumiere, marris de ce qu'on les eclaire de pres. Mais quelque chose qu'ils facent, il faut que ceste lumiere luise, & iamais ils ne changeront sa nature. Et tout ainsi que les orages & les brouillards peuuent pour vn temps troubler nostre air, & dérober à nos yeux la clarté du Soleil, lequel cependant ne laisse de luire à leurs yeux en sa beauté: Ainsi Satan & ses suppolts peuuent pour un temps en quelques contrees empêcher que ceste parole ne reluise comme auparavant, mais ils ne pourront iamais esteindre ceste lumiere, ni empêcher qu'elle ne luise ailleurs. Que si Satan renuerse quelques chandeliers, Dieu estend sa main, & enleue la chandelle, & la transporte ailleurs selon les secrets de son conseil, & de son election eternelle. Si par mi nostre posterité Dieu a grand nombre d'eus, la predication de sa parole croistra & fructifiera malgré l'inimitié de Satan & du monde. Ou si par mi nostre posterité Dieu a peu d'eus, si est-ce que Dieu se reseruera toujours quelque residu, duquel il se seruira en son temps, pour releuer sa parole, que les ennemis de la verité penseront estre esteinte, & recueillie à soi vn grand peuple par lequel il soit serui.

Or entre les reproches & iniures qu'on vomit  
 aujour-

aujourd'huy contre cette parole contenüe es saintes Escritures, celle-ci est des plus ordinaires, que l'Escriture est obscure & ambigue, & par consequent mal propre à decider les points de la foy; & qu'il est besoin d'un juge infallible, lequel juge ils disent estre l'Eglise Romaine; entendans par l'Eglise Romaine le Pape, lequel ils disent ne pouuoit errer en la foy. Ils parlent de l'Escriture sainte comme si chaque ligne estoit vn enigme, & comme si toutes les paroles y deuoient estre prises à controsens, afin que le peuple ait ce liure, pour suspect, & soit comme ceux qui sous chaque pierre s'imaginent vn scorpion. Ce qu'ils font, afin que le peuple laissant ce liure comme vn liure dangereux, & où on ne voit goutte, s'en remettre à leur tradition, qui est tant lucratiue au Clergé Romain, & sur laquelle est fondé l'Empire du Pontife Romain. Est à noter que la pluspart de ceux qui tiennent ce langage sont personnes qui n'ont jamais mis le nez en l'Escriture, & qui n'y ont jamais trouué aucune difficulté, pource qu'ils n'y ont jamais rien leu: Ausquels si on demandoit, *qu'avez-vous trouué d'obscur en l'Escriture?* ils auroyent de la peine à responde.

Pourra bien aduenir que quelqu'un de l'Eglise Romaine s'estant mis à lire l'Escriture la trouue pleine de difficulté. Mais cestuy-là doit prendre garde qu'il ne soit de ceux dont parle l'Apotre en la seconde aux Corinthiens au 4. chapitre: *Si nostre Euangile est conuert: il est conuert à ceux qui perissent, ausquels le Dieu de ce siecle a auéglé les entendemens, assauoir aux incredules, à ce que l'Euangile de la gloire de Christ ne leur resplendist.*

Tels sont semblables à ceux qui estans frappez d'aneuglement se plaignent que le Soleil s'est obscurci : Et aux Capernaïtes , qui estans durs de cœur disoyent que les paroles du Seigneur estoient dures. Car ces gens estans volontairement aveugles, imputent à la parole de Dieu leur aveuglement : duquel Dieu les a iustement frappez, pource qu'ils ont reietté sa parole, & ne l'ont voulu prendre pour regle de leur vie.

Car au fonds ceux qui accusent l'Ecriture d'obscurité l'accusent aussi de mensonge : veu que S. Pierre en sa 2. Epistre chapitre 1. dit *Que la parole des Prophetes est comme vne chandelle qui éclaire en lieu obscur* : Et David au Pseaume 19. dit que *la loy de Dieu est pure, faisant que les yeux voyent* : Et au Pseaume 119. *Ta parole est vne lampe à mon pied & vne lumiere à mon sentier*. Si la loy de Dieu contenüe es liures de Moÿse & des Prophetes est vne lumiere qui éclaire les ames, quelle apparence d'accuser d'obscurité les escripts des Apostres & Euangelistes , lesquels ont escrit avec beaucoup plus de clarté?

En cela certes Dieu est manifestement outragé. Car est-il croyable que Dieu qui est le Pere des lumieres ait obscurei expres la doctrine de salut? Est il croyable que Dieu qui est la bonté mesmes ait pris plaisir à faire comme vnpere malicieux qui couche expres son testament en clauses ambiguës pour semer des procez entre les enfans?

En un seul point ces diffamateurs de l'Ecriture ont raison : car en disant que l'Ecriture est obscure , ils confessent tacitement que leur religion ne s'y trouue pas : De laquelle ils tordent & gèhent

ment quelques passages pour les accommoder à leur intention. Ils n'ont garde de trouver l'Escriture claire pour le sacrifice de la Messe, & pour le Purgatoire, & pour l'invocation des Saints, & pour le service des images, & pour la succession du Pape ou la primauté de saint Pierre, & pour la puissance du Pape à déposer les Rois, veu qu'elle n'en parle point du tout. Eie ne doute point que les Aduocats du Papisme ne desirassent que l'Escriture fust beaucoup plus obscure qu'elle n'est, afin qu'elle eust moins de clarté & de force à les condamner. Car comment voudroyent-ils que l'Escriture fust claire, veu qu'ils la cachent au peuple? & n'en lisent en leur Eglise que peu de passages en langue que le peuple n'entend pas?

Non pas que ie vueille dire qu'il n'y ait rien d'obscur en l'Escriture, & qu'elle soit aisée à entendre à chacun. Il y a des Prophetes & reuelations où les plus sçauans se trouvent empeschez. Seulement ie dis qu'il y a beaucoup de choses en l'Escriture qui sont claires, & qui n'ont besoin d'interprete, & que ces choses claires sont suffisantes pour nous sauuer. Tout ce qui est necessaire à salut est couché clairement en l'Escriture. Elle dit que Dieu a créé le monde, que l'homme s'est détourné de l'obeissance de Dieu par le conseil du diable. Elle dit que Iesus Christ est mort pour nous, & est resuscité, & est monté au Ciel, & qu'il viendra au dernier iour pour iuger le monde. Elle commande d'aimer Dieu de tout son cœur: elle defend de tuer, paillarder, dérober, &c. Ces choses ne sont-elles pas claires & intelligibles à vn chacun? Faudra-il aller au Pape pour en auoir l'in-

terpretation? Or de tels enseignemens clairs il y en a assez en l'Escriture pour nous sauuer. La parole de Dieu est vn fleuve ou les agneaux passent à gué, & les elephans y nagent, & y perdent pied. Car les simples comprennent les choses aisées, & les plus sçauans ne peuvent sonder les choses profondes.

L'obscurité pretendüe de l'Escriture n'a point empesché les fideles de Beroë d'aller consulter les liures des Prophetes, pour voir si saint Paul les a fidelement alleguez: Elle n'a point empesché Eunice la mere, & Loys la grandemere de Timothee d'instruire leur fis es saintes Escritures. Elles les lisoient non pas pour se rendre iuges des passages obscurs, mais pour retenir pour elles ce qui est clair, & qui leur estoit utile pour former elles & leur fis à la crainte de Dieu.

A ces ennemis de la lumiere de l'Euangile faut ioindre les profanes, les yutongnes, les paillardes, les vsuriers, & rauseurs, & blasphemateurs, lesquels ne souffrent point qu'on les repreine, & admoneste par la parole de Dieu. Ils ressemblent à des personnes qui dorment, & qui se fachent quand on les reueille, & qui se despitent quand on leur met la chandelle pres du nez. Car estans seules de viure à leur fantasia ils ne veulent pas qu'on leur trouble la conscienco par des remonstrances importunes, & estiment qu'on les ranse afin de prendre sur eux de l'autorité. Comme si vn homme qui se va noyer ob precipiter se conuoçoit contre celui qui l'arreste pour le sauuer, disent: *Laissez-moi, vous m'atez rien à me commander. Si est-ce qu'il faut qu'ils soyent vn iour iugez par ceste*

cette parole, laquelle ils mesprisent. S'ils ne reçoivent les aduertissemens de leurs Pasteurs & de leurs freres, ils sentissent les iugemens de leur Maître, & les derniers effects de la colere.

Telles sont, mes freres, les causes pourquoy la doctrine de l'Evangile est appelee la lumiere du monde: De laquelle pource que les Apostres deuoient estre annonciateurs, parmi les nations, Iesus Christ leur dit. *Vous estes la lumiere du monde.* Dont aussi ce qui est dit du Soleil & des astres au 19. Pseaume leur est appliqué par l'Apostre saint Paul au 10. chapitre aux Romains: *Leur son est allé par toute la terre, & leurs propos iusques aux bouts du monde.* C'est la charge que Iesus Christ leur a donnée, deuant que monter au Ciel, assauoir d'endoctriner toute nation, Matth. 28. En cela a esté differente la charge des Apostres d'avec celles des autres Pasteurs, non seulement en ce qu'ils ont esté eleus, & enuoyez immediatement de Iesus Christ sans autre forme de vocation ordinaire, & en ce qu'ils ont receu les dons du S. Esprit en plus grande mesure; Mais aussi en ce que leur charge n'estoit point restreinte à vn pais ou à vne Eglise particuliere: chacun d'eux ayans la conduite de l'Eglise vniuerselle: Comme dit saint Paul de soi-mesme en la 2. aux Corinthiens chap. 11. *Qu'il auoit le soin de toutes les Eglises.* Pourtant aussi cet titre d'estre la lumiere du monde leur est attribué par vne prerogatiue excellente, & en vn sens qui leur est particulier.

Et neantmoins chaque Pasteur de l'Eglise, selon sa mesure, & selon la petite portee est établi de Dieu pour estre vne lumiere au monde, &

porter ce flambeau devant le peuple qui lui est commis. Cet eclairement se fait par deux moyens, aliauoit par la saine & pure predication, & puis par la bonne vie & sainte conuersation.

Quant à la predication, le Pasteur qui vit splendidement parmi des grandes richesses, & cependant ne presche point, ressemble à vne lanterne doree où il n'y point de chandelle.

Le prophete Esaie au chap. 56. les appelle *des guettes auuegles & des ebions muets*. Ce sont Pasteurs qui paissent leurs corps au lieu de repaistre les esprits de leur troupeau. Car à tous Pasteurs s'adresse aussi ce que Dieu dit à Esaie, au 58. chap. *Crie à plein gosier, ne t'espargne point, eleue ta voix comme vn corne, declare à mon peuple son forfait, & à la maison de Iacob son iniquité.*

Contre ceste reigle pechent les Papes, qui se disent Pasteurs de l'Eglise, & cependant ne preschent point; car ils ont changé la crosse Episcopale ou baston Pastoral en vne triple couronne, qui s'appelle **LE REGNE**. Ils se disent successeurs de S. Pierre qui traouilloit incessamment à la predication de l'Euangile.

Item les Euesques defaillent à ce desoir desquels la pluspart ne presche point: car comment prescheroyent-ils, ven qu'on donne des Eueschez à des enfans au berceau, & à des hommes qui à peine scauent lire, & ausquels l'Escriture sainte est vn liure incogneu?

Adioustez à ceux là vn nombre infini de Prestres, sans cure, & qui ne preschent point: Ils gagnent leur vie à chanter Messes pour le premier venu.

Le mets

Je mets aussi en ce rang les Hermites qui estans Prestres vivent en la solitude sans communication avec le peuple. Ceux-là sont-ils la lumiere du monde? s'ils ont receu vn talent, comme ils estiment, pourquoi l'enfouissent-ils aux champs, au lieu de le multiplier? pourquoi refusent-ils d'edifier leurs prochains? pourquoi se retrenchent-ils eux mesmes du corps de la societé humaine comme membres inutiles? ou s'ils sont ignorans & incapables d'enseigner, pourquoi fuyent ils la societé de ceux desquels ils pourroyent apprendre? A ce propos sert ce qui est dit au chap. 11. des Prouerbes, *Le peuple maudira celui qui retiens le froment, mais la benediction sera sur celui qui le debite.*

Mais ce n'est rien de prescher si on n'enseigne comme il faut. Il faut proposer la parole de Dieu en la pureté & simplicité, sans meffange de fausses doctrines, & de traditions, & d'inventions des hommes. Sans curiosité & affectation, pour estaler son eloquence, & acquerir la reputation de sçavant. Autrement la predication sera vne fausse lumiere, semblable à ces faux feux qu'on appelle *des ardens*, qui meinent ceux qui voyagent de nuit en des fondrieres ou en des precipices.

Faut aussi autant qu'il est possible, que nostre parole soit claire & intelligible, & non embrouillée de termes obscurs, & surchargée de paroles superflües: car nous parlons afin d'estre entendus. A grand peinc la parole du predicateur pourra estre appelee vne lumiere, si celui qui parle ne s'entend pas soi-mesme, ou s'enveloppe expres de paroles obscures.

L'ardens aussi des exhortations y est requise.

afin que nostre parole ne soit point vne lumiere semblable à la clarté de la Lune, qui moifond au lieu d'eschauffer : mais soit semblable à celle du Soleil qui eschauffe en éclairant.

A ceste pureté & simplicité de la predication doit estre coniointe la bonne vie, & sainte conuersion. Car c'est aussi en ce sens que les Pasteurs sont la lumiere du monde, Selon que Iesus Christ dit au veiser suiuant, *Que vostre lumiere reluisse deuant les hommes, afin que les hommes voyans vos bonnes œuures glorifient vostre Pere qui est es Cieux.*

Sans cela la predication ne profite pas, pource qu'elle est contredite par la vie. On dit, *cet homme monstre un chemin & en prend un autre. Il seroit comme il parle, s'il croyoit ce qu'il dit. C'est la voix de Iacob, mais les mains d'Esau.* Qui est vn mal qui n'est que par trop frequent, à nostre grand regret, selon que souuent il aduient que celui qui porte la lanterne choppe plus rudement, & est le moins éclairé. De tels Pasteurs l'issuë est semblable à celle des chandelles qui se brulent en éclairant. Car en enseignant les autres ils se perdent, & courent à leur perdition.

Or combien que ceci soit dit directement aux Pasteurs, s'est-ce que le peuple a aussi part à cet enseignement. Car chaque fidele est appelé vne lumiere par l'Apostre aux Ephesiens chap. 5. *Vous estiez autrefois tenebres, mais maintenant vous estes lumiere au Seigneur.* Et au 16. chapitre de S. Luc ils sont appeles *enfans de lumiere* : & ce nô seulement pource que Dieu les éclaire par son Esprit & par sa parole, mais aussi pource qu'ils sont appelés pour *reluire comme flambeaux au monde, portés au deuant d'eux la parole de vie,* Philip. 2, Par

Par ceste consideration l'Escriture nous exhorte à viure sainctement, & honestement. Car l'Apôstre au 5. chapitre aux Ephesiens, apres auoir dit, *Vous estes autrefois tenebres, mais maintenant vous estes lumiere au Seigneur*, en tire ceste exhortation, *cheminez donc comme enfans de lumiere*. Car comme dit Iesus Christ au 3. chapitre de S. Iean, *Celui qui s'addonne à versé vient à la lumiere, afin que ses œuvres soient manifestées*: Mais *quiconque s'addonne à choses meschantes fait la lumiere*. Les tenebres sont favorables aux larrons & adulteres.

C'est là l'exhortation de l'Apôstre aux Romains au 13. chapitre, *La nuit est passée, le iour est approché, rejettons donc les œuvres de tenebres, & soyons reuestus des armes de lumiere*: & *cheminons honestement comme de iour, non point en gourmandises, ni en yrogneries: non point en couches & insolences, &c.* Mais *soyez reuestus du Seigneur Iesus Christ, & n'ayez soin de la chair, pour accomplir ses conuoitises*. Et au 5. chapitre de la 1. aux Theſſal. *Vous estes tous enfans de lumiere, & enfans du iour. Ainsi donc ne dormons point comme les autres, mais veillons & soyons sobres. Car ceux qui dorment, dorment de nuit, & ceux qui s'enyurent, s'enyurent de nuit*. Où vous voyez que de ce que nous sommes qualifiez enfans de lumiere l'Esprit de Dieu prend occasion de nous exhorter à honesteté, & sobriété, & innocence: & particulièrement à estre vigilans. Car comme on n'allume point la chandelle pour dormir, aussi ceste belle lumiere de la parole de Dieu ne nous eclaire pas afin que nous nous endormions en vne securité charnelle, & en vn assoupissement profane. Mais afin que nous soyons vigilans, remarquans

I. Die.

M

les occasions & le temps de nostre uisitation, & ayons les yeux ouuerts pour descouurer les embusches, & preuoir les tentations du monde & du diable.

Finalemēt puis que Dieu nous a eclairez de sa lumiere, & illuminez de sa saincte cognoissance, il est certain qu'il veut que nous nous seruions de ceste lumiere pour eclairer nos prochains, comme quand vne chandelle sert à en allumer plusieurs. Et tout ainsi que les eaux claires & toyees representent l'image du Soleil, & renuoyent ses rayons sur les choses prochaines, ainsi Dieu veut que les graces que nous auons receues de lui, qui est le Soleil de iustice, nous forment à son image, & seruent à eclairer nos prochains, les instruisant & les exhortant à craindre Dieu, les consolant en leurs afflictions, & leur tendant la main es passages glissans, & leur monstrant exemple de charité enuers le pauvre, de sobriété, chasteté & honnesteté, & droicteure en toutes nos actions: glorifians Dieu par œuvres & par paroles: *Magnifians les vertus de celui qui nous a appelez des tenebres à sa merueilleuse lumiere.*

1. Pier. 2.  
9.

Si nous viuons ainsi, ceste saincte lumiere de la parole de Dieu nous meindra à vne autre lumiere, assauoir à celle dont parle S. Paul aux Colossiens chap. 1. disant que *Dieu nous a rendus capables de participer à l'heritage des Saints en la lumiere.* Là il n'y a point de Soleil, car la face de Dieu illumine ses Saints. Là il n'y a point de vicissitude de iours & de nuicts, ains vne lumiere continuelle. Là les enfans de Dieu reluiront comme le Soleil quand il est en sa force. Là est vne ioye incomprehensible,

ble, sans fin, sans mesure, sans intermission, en l'union eternelle avec Iesus Christ nostre Seigneur. Auquel avec le Pere & le sainct Esprit soit honneur & gloire es siecles des siecles. Ainsi soit-il.

# SEPTIESME

## SERMON

Aux Rom. chap. VIII. v. 26.

*Mais celui qui sonde tes cœurs cognoist quelle est l'affection de l'esprit, car il fait requeste pour les Saincts selon Dieu.*

**L**A regeneration du fidele est vne œuvre de l'Esprit de Dieu, par lequel Dieu met en ses esleus les semences d'une nouvelle vie, & forme dedans eux vn nouvel homme, qui a vn nouueau cœur, vne autre sorte d'yeux, à scauoir les yeux de la foy, d'autres pensees & affections que les naturelles. Au lieu de la cholere il a le zele: au lieu de la ioye insolente, il a la paix de conscience: au lieu de la tristesse charnelle, il a la repentance: au lieu de la crainte des hommes, il a la crainte d'offenser Dieu. Bref c'est vne nouvelle creature formee à l'image de Dieu, par ce doigt de Dieu qui est l'Esprit de sanctification. Celui qui a